

Nunatsinni piniartut aalisartullu inuuniutaat eqqarsaatigalugu piniakkanut aalisakkanullu ulluliisarnarit ullutsinnut naleqquttuunersut pillugit oqallisissiatut siunnersuut
(Gerth Mikaelson, Nalaraq)

Akissuteqaat

(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

Apeqquteqaat aallaavigalugu oqallinnissamik soqutigintartumut siunnersuuteqartoq Gerth Mikaelson, Nalaraq, Naalakkersuisut sinnerlugit qutsavigaara.

Kalaallit Nunaanni aalisarnarit amerlanersaat piffissamik killilersugaanngillat, 1. januarimit 31. decemberimut aalisartoqarsinnaalluni. Taamaattoq nipisanniarnermi, kapisilinniarnermi kiisalu aqutsiveqarfinni avannarpasinnerusuni saattuarniarnermi piffissami aalajangersimasumi aalisartoqartarpoq. Tassunga atatillugu maluginiaqquneqassaaq aalisarnernut pingasunut taakkununga aqutsinissamik pilersaarusiortfigineqarnikuummata, taakkulu Aalisarneq pillugu Siunnersuisoqatigiit aalisarnermillu ingerlataqartut qanimut oqaloqatigalugit ataqatigiissaareqatigalugillu suliarineqartarmata.

Aalisarnermut piniarnermillu piffissamik killilersuinerit arlalinnik assigiinngitsunik pissuteqarsinnaapput.

Saattuarniarneq pissusissamisoortumik ukiup aallartinnerani qaammatini siullerni avannaani aqutsiveqarfinni sikusarnera pissutaalluni saattuarniartoqartanngilaq. Nipisannut tunngatillugu nipisat aatsaat upernarnerani Kalaallit Nunaannut takkuttarput inuussutissarsiortunillu kissaatigineqartarluni saniatigut timmissanik pisisuukkat killilersimaartinneqarniartarput aalisarnermiit tunisassiat MSC-mik nalunaaqutsigaanerit qulakkeerniarlugu. Kapisilinnut tunngatillugu kapisilik aasakkut nunatta imartaanukartarpoq taamaammallu aatsaat augustimi aalisarneq aallartinneqartarluni. Pisassiissutigineqartut aalisarneqareerpata imaluunniit ukiumi aalisarfimmi kapisilinniarneq naappat aalisarneq unitsinneqartarpoq. Aalisarfissatut piffissaliussaq aamma aalajangersarneqartarpoq kapisilinnik illersuinissaq tunuliaqutaralugu, kapisilillu nunat tamalaat akornanni aalisagaavoq ingerlaartartoqaalisagaqatigiillu aarlerinartorsiortarlutik. Taamaammat killilersuineq imartanik atuinnissamut isumaqatigiissutit naapertorlugit nunat tamalaat suleqatigalugit ataqatigiissarneqartarpoq.

Taakku saniatigut saarullinniarneq aamma suffisarfiini suffinerisa nalaanni unitsinneqartarpoq. Tamatumani saarullinnik illersuiniarluni taamaaliortoqartarpoq sapinngisamillu amerlanerpaanik siunissami aalisarneqarsinnaasunik suffinissaa qulakkeerneqartarluni, siunissami kinguaassanut iluaqutaqqullugit. Saarullinnik aqutsinissamut aamma pilersaaruteqarpoq.

Piniarnermut piffissanut killilersuiffiit amerlanngillat, taakku piaqqiornissaat neriniarnissaallu isiginiarneqartarluni, soorlu tuttunut umimmannullu, nannunut timmissallu ilaannut.

Arfernuk angisuunuk mikisunullu piniarnerit piffissamik killilersuiffiunngillat, arfivik taamaallaat killersuiffigineqarpoq, tassa inersimasut taamaallaat 1. aprilimit 31. decemberimut piniarneqarsinnaammata.

Nannut aamma eqqissisimatitaaffeqartinneqartarput piaqqiornissaat neriniarnissaallu illersorniarlugit, tassani arnaviap piaqqallu ukiunnginnerani puallarnissaat pingaaruteqartarmat. Piaqqat arnaminnik pinngitsuuisinnaanngitsut arnavissallu ataatsimik arlalinnilluunniit piaqqisartut ukioq kaajallallugu eqqissisimatitaapput.

Miternut, appanut taateraannullu pisassiissutit kiisalu piffissami killilimmi piniarneqarsinnaanerit killilersuutaapput timmissat taakku amerlassutsimikkut aarlerinartorsioortinneqannginnissaat qulakkeerniarlugu, assersuutigalugu appat kiisalu timmissat taakku manniliortarnerallu illersorniarlugit. Tamanna aamma pissutigalugu timmissanut pisassiissutaanngitsunut pisassiissuteqarfiusutulli piffissami killilersugaapput.

Kiisalu tuttunut umimmannullu uumasogatiginnut amerlanernut pisassiissuteqarfiullutillu piffissami killilimmi piniarneqarsinnaapput. Uumasogatigiaat ataasiakkaat pisassiissuteqarfiunngillat, piffissamilli killilersugaallutik tuttut umimmaallu piaqqiortarneranni illersorniarlugit kiisalu pingaaruteqartumik neriniartarneranni, taamaalillutik ukioq anigorniassammassuk. Inuussutissarsiuutigalugu piniartut pingaartinneqarnerusarput, soorlu uumasqarnerpaani piniartarfinni annerni sivilsunermik piniartarlutik kiisalu akuersissummi ataatsimi uumasut amerlassusaat marloriaataasarlutik.

Nungusaataanngitsunik meeqqatsinnullu kiisalu ernutatsinnut iluaqutaasussanik uumasunik atuinissatta qulakkeernissaat Naalakkersuisunit pingaartinneqarpoq. Aamma aalisartut piniartullu piniakkagut aalisakkagullu aquanneqarnissaannut tunngatillugit ingerlaavartumik oqaloqatigisarnissaat pingaaruteqarpoq. Taamaammat ingerlataqartut kattuffiillu attuumassuteqartut peqataatinneqartarput isumasiorneqarlutillu, aamma aqutsinernut tunngasunik apeqqutit ingerlaavartut pillugit, soorlu piniakkat aalisarnerillu piffissamut killilersugaasut pillugit. Assersuutigalugu nipisarniarnermut aqutsinissamik pilersaarut inuussutissarsioortut peqatigalugit nutarterneqaqqammerpoq, ukiorlu manna kapisilinniarnermut aqutsinissamut pilersaarutip nutarterneqarnissaa aallartinneqassaaq.

Naalakkersuisut piffissamut killilersukkat aqutsinissamullu suliniutit allat pillugit oqaloqatigiinnerit ataqatigiissaarinerillu aalisartut piniartullu sinniisaat peqatigalugit sulit pisarnissaat kissaatigaat. Atuisut oqaloqatigalugit pitsaanernik aaqqiissuteqartarpugut, isumalluutitta pigiinnarnissaat kiisalu taakkua pitsaanerpaamik atornissaat aamma eqqarsaatigalugit.

Oqallilluarisi.